

四庫全書

集部

欽定四庫全書

東維子集卷八

元 楊維禎 撰

序

送鄒生奕會試京師序

漢儒明經貴不倍其師說能不倍其師說者上召用之高下其材為博士郎大夫部刺史馴至九卿丞相御史者不少也吾是以知漢士之近古也其為術也有師宗

其為行也有操尚未始以經術自進為售利祿之具也  
去古日遠則下之干進者以經術而上亦以是設科而  
取之然今日得之明日棄之矣視前日之所業者不啻  
象龍芻狗物也尚欲責其不倍師說於終身而不弃者  
可得乎吳郡鄒奕弘道其大父為士表吾之友也士表  
樂善好客教子孫尤切切不重千金費遠延碩師居其  
家此奕所以經之明而材之達也今年秋江浙鄉試以  
詩經充赴有司者凡七百人中式者僅十人而已而奕

又為其魁蓋其得於祖父師之講明有素者可知已將  
如京師以余為大父執行也拜而乞言故余為陳漢士  
之近古者望之況今天子既復科以取士又且掄選經  
術之老者侍講筵進士之有經術者固將以次召用如  
漢之九卿丞相御史者不難也奕之得於祖父師之講  
明其可一日而忘去乎奕勉之大父不及見矣異時果  
於無負所學也豈惟慰望於其師實慰汝祖於地下也至  
正丁亥冬十一月初吉序

送彥彙遊京師序

孔子曰士而懷居不足以爲士知古人君子未嘗不遊也而世之遊者漫矣志無以自信貿貿焉行四方以萬一乎詭其所遇取盈而復以蓄其身以累其人往往是也若乃君子之遊延陵君子之不幸生於東徼也志不有其國而獨志於上國之遊以歷見夫華產之人物先帝王之遺風善政以廣其耳目之陋意氣之隘約而反之於中有合不合斯遊之不可已也嘉定彥彙生於

延陵君子之鄉曩嘗勇不自禁出吳關歷毗陵句曲折而上金陵遂絕大江而北涉洙泗以翱翔乎闕里過涿野以蹈厲燕趙之俗而遂達乎京師以觀天子之光京師窮貴人有奇其才挽置於宿衛而彥栗徑決去不暫留是其志不在區區利達而所存者大矣今有不憚數千里行役如曩時過吳門別余曰余行李如京不能與子久處已余壯其遊不難而其志又不苟也知其遊似昔君子上國之遊而非代之漫焉而詭其所遇者類也

他日歸復見子吳門聽子之言議覘子之心胸有以驚異予者而後知子之遊不可以已者如是顧吾在吳栖其困滯如退羽之鴻不能以丈尺奮飛於子之行也其不投袂而起乎

謝生君舉北上序

上饒謝生鈞從余遊者十年通春秋五傳學其才日茂不已自幼博行孝睦人無間言往嘗以行藝書于黨正連試有司弗售不一咎有司而咎其學未至也益進修

弗勸今年秋來別余曰鈞辱先生教而未有仕路以行  
先生學也辱在泥塗鈞耻之先生耻之幸吾鄉應奉張  
公有以挾鈞京國之行謹造請先生幸先生賜一言以  
警鈞余為之喟然曰才弊於無先行衰於寡黨此古今  
之士之通患也士負才行有不幸老死于三家之村千  
室之邑者不尠矣往往思借交青雲之士卒而奮焉尺  
長斗滿皆得以伸所有而況於才之茂行之卓者乎生  
往哉吾聞張公大相府之賓卿也相府以好賢聞天下



張公以賢薦相府生患才之不懋行之不卓耳不患無其先與其黨者矣吾見張公之不以嫌而避賢也吾見生之賢不以次而進也傳曰大夫將昌以其得士張公以之又曰庶人將昌以其得子謝氏父以之又曰線因鍼入不因鍼急女因媒成不因媒貞生以之

送吳子照遊閩序

雲間吳生照將遊閩以四明臧彥誠之書來乞序其行具言生年少負邁往之氣加以博學好古慕先生之奇

文章如慕太史公蓋將歷覽形勝結交豪傑于以開豁  
其心胸發舒其意氣或者有所資以成其才也乞先生  
一言申其志余謂古百越地在禹貢揚州之域物之貢  
聞天下而人才之出未多見豈山川磅礴之氣未發泄  
歟抑王者德化之所未覃也漢以來封疆之郡縣之覃  
以詩書禮樂之澤然後人才輩出與中州文章道義之  
士等至我朝涵養樂育之既久士之擢高科躋膺仕者  
磊磊相望官於其地者弗以冒嶮巇犯瘴癘為難其山

川足以豁心目人才足以取師友生之往也登覽或遇  
隱君奇士有相識者或未識而已相知者詢及於余即  
啓行橐出余鐵笛傳及史鉞絕辦凡若干言必有以奇  
我者奇生矣他日歸吳尚有以徵吾言

張先生南歸序

荆士多無恒經治亦往往不顯有一年輒更或半年纔  
更而竊中科以故士之經愈不顯且又視經師之利不  
利為嚮背意學經將已明道也豈計利不利哉以科利

而學經則科一利而經復棄矣終亦必亡而已矣嘉禾  
張生汝霖獨於經治有專習曩余在錢唐時首以父命  
來受春秋五傳學更鄉舉者三而藝未競生不以咎有  
司而咎經術之未至益恒若力所習經有加無已坐誦  
行思恒若無誨者故又負笈不遠水陸尋余九山之澤  
以終其業焉非其學經志於明道而不計科之利不利  
者歟吾義其不畔吾門又竒其性之有恒而志之必有  
成也嘉禾之野其得遺其人也哉吁春秋主斷之書志

成者及之也明其道不計其功者又春秋之教也若生之志蓋已得春秋之斷而其道已得春秋之教矣他日推之任也天下之治孰禦焉彼習經以利科科一利而經復棄終亦必亡而已者又何議為

送韓奕遊吳興序

同里生韓奕從余受詩春秋學行日脩才日茂其為文如雲興鳥公未見其止也今年從予呂氏塾輒思汗漫為神京遊余止之復有請曰奕從先生學幸知經史行

墨然聞先生奇氣多發於東西洞庭大小二雷七十二  
弁之峰今將訪先生舊遊魚龍虎豹風煙林壑之音遇  
以擴所見而終所業焉幸先生賜一言以警教亦余  
嘉其志曰人之學猶海也水沿河溯以弗至于海不止  
海集衆流而后為百谷王也學其可以小自滿哉洞庭  
之西有蔣氏義門劉范世家在焉巽毅鳳麟皆從余游  
者也皆好學不勸而知學之不可以小滿也又當不遠  
數百里尋余泖之鄉而卒業焉矣往哉與之洞庭上讀

書然後繇洞庭而浮大江度洪河上北嶽以盡天下之大觀吐而為書以獻萬言于明天子也蓋發軔乎此行已矣勉哉至正十年三月三日序

送齊易岩序

太極理也一陰一陽生焉教之所出也尸物如天地而不能逃乎十二萬九千六百之紀而況於萬物乎周與秦合不能逃乎五百一十六之數伯而王又不逃乎十七之記而況於一身乎聖人作易前數之用於著龜神

矣然未聞一語一畫為之兆也兆於一語一畫之微而  
捷乎著龜之著數之用益神矣此先天之學在魯為梓  
慎鄭為裨竈齊為國甘公漢為眭京晉為管郭唐為袁  
桑宋為邵子元為傅氏初菴菴之宗為齊氏易岩也易  
岩之言曰初菴之傳得之建昌廖學海學海得之於蜀杜  
可大可大得之於王天悅天悅實受之邵子也天悅之  
學幾絕莖其書玉枕中蜀寇發塚出秘書可大賄盜之  
人不能傳而學海以直言得罪配軍籍漢陽道遇可大



可大已知其姓名曰吾數當傳子為偕見郡將出軍籍館諸道宮為弟子國初有聞于世皇世皇將召之學海業已語其女曰我若干日死死若干日朝廷命來我已死且索我書我書當傳者傳氏立名人也其人在某所某日來異日官極品汝賴之官且賜田若干頃矣已而果然初菴之沒三年而易岩始生初菴垂死謂其徒曰汝曹口耳之學徒得吾膚淑吾書而得吾髓者其齊氏某乎易岩生四歲知讀易長於河洛七緯太乙九宮之數

及星算鳥占嘯風鞭霆之術罔不洞究故於初菴之學  
峻躋峰極非一時儔輩可幾也予嘗異天人之學父子  
不相授也其授於人者亦有數焉則其觀於物者可知  
已易岩之觀天者吾不識之其觀物者吾見其於一語  
一畫得知者衆矣雖然予於易岩有問矣道之難傳甚  
於數也堯以是傳之舜者舜以是傳之禹禹以是傳之  
湯湯以是傳之文武周公而及於孔子孟軻孟軻死不  
得其傳焉嘻道之傳者其亦有數乎無數乎軻之後其

可無傳已乎易岩曰道之傳天也亦人也是陰陽大極之說也易岩去予而之京師也請書以為序

送何生序

何生伯翰氏其先西夏人也祖息簡禮嘗錄僧事于杭因家焉父益憐質班早喪翰生五歲依舅氏舅氏因以母姓姓之母素賢通文史既寡以節自誓教翰有法日出就外傳夜歸課其業年十六歲受經於予通春秋五傳毛氏詩尤長於易遭時喪亂士以弓刀之習易鉛槧

翰獨負郭闢圃奉菽水于母暇則退處小室理故書收  
緝予平生遺落文草遂補注吳復所編予古樂府集行  
于時人稱其學該識廣復不能過之今年夏文闈復開  
翰就試先三月靈鵲巢其書舍未見其扶梁啓離戶占  
者知其為中雋之兆而不知其學有素也將會試春官  
同門友為賦詩供張西門之外求予為叙遂為書其世  
出行藝之槩于卷首云

送李志學還吳序

太尉府僚友官以百數惟右轄李公推魯少文可以屬  
大事叅左右轄官者亦以百數惟軍諮李君雍容諷議  
可以贊大功故占東諸侯之後事者亦不於其兵強弱  
馬壯敝而以其叅諮幙府者得人與不得人也今之所  
謂閭里豪乘時而奮類鳩於安鄙於肉食嗚呼菜傭而  
欲倚之以集事亦誤乎必其雄才卓識員王伯畧可以  
登公輔之器者然後可與成大事立大功若今李君者  
殆其人矣乎吾聞河間多禮法士而李君者殆其人矣

乎吾聞河間多禮法士而李君者夙抱其節承教詔於  
賢母如嚴師傅當戎馬猾夏時節即慨然有平河洛志  
而况太尉府得知己乎雖然西虞之拔冗以進將以伺  
吾釁也未足為吾憂忽又無故而退無以乘吾間也未  
足為吾喜君歸太尉府太尉問君西虛實狀吾攻守利  
害何如君必有以對對必有御戎要畧為太尉規者慎  
勿為閭里豪鴟而鄙者談也至正乙亥夏六月壬申序

送劉生入閩序

古公卿等絕卑賤其與圖事必有取於卑賤之士士之  
奇特鯁正亦願舍之以所有上下至於交相得而後事  
可圖已漢叔孫通有兩生不能取項籍有韓生齊王信  
有蒯生不能用鮑生為蕭何取陸賈為陳平取王生為  
釋之取吳公之取賈生田延年之取尹翁歸暴勝之之  
取雋不疑之六君子負守將之尊執臣之貴而未嘗挾  
以自尊貴必有取於大人者以其奇特鯁正可與圖事  
者也今公卿不取士久矣吾始於貢公見之公以戶部

尚書入闕天子益以理財贍兵者責焉四方士待公行者幾何人而錢唐劉生獨以過人之才及其骨鯁風裁為公所知公取生惟恐失之生亦愿答以其所有惟恐不逮吾見貢公之出遐方王事確乎其有成算恢乎其有成功也已夫召陸諸生不失其所矢而六君子之道益光生思會於貢公而益光於貢公者其不得自行召陸諸生子哉生嘗以茂才被肅政使丑的公之薦授校官不就今樂知於貢公而起也其以會知己較然不自



欺也諗矣杭人能詩者歌之君信其人序之生名中字  
庸道世山東人

送王公入吳序

王者人才得於鄉三物之所取是也戰國人才得於客四  
豪之所養是也兩漢人才得於薦公卿之相推轂是也  
唐人才得於科懷牒以自試是也士之興至於唐宋之  
科其去王道也遠矣今取士不免於科軍興來科亦廢  
不幸又不得於薦則得於客耳三吳之會為今淮吳府

也客之所聚者幾七千人吾求客於戰國得孔伋焉孟軻焉荀況魯連焉毛遂馮驩焉牛畜荀忻徐越焉而秦儀華妾婦爾不足以客進也淮也吳之客七千異於妾婦者幾人有所謂越乎忻乎畜乎驩乎遂乎連況乎連況不可況軻乎伋乎哉或曰淮吳有王明氏者澄不清撓不濁有俞賢氏者言中倫行中構有用仁氏者庶範乎靡俗治幾乎循吏有陳敬氏者納言骨鯁風裁古也有姜儀氏者人倫臧否冰鑒美也淮吳之客何劣於戰

國哉縉雲王生時以儒科廢於古文學有年將挾之以入吳別予於杭湖上求一言以行予方疑論淮吳之客而生將客焉往哉吾將卜淮吳之客於生也諗有五人者五人引其類以進生不為今遂驩其為畜忻越矣苟妾婦也其歸矣哉

吳氏歸本序

錢唐吳觀善字思賢自杭之淞謁東維先生曰善之外高祖徐防禦氏在宋為小兒醫顏壻曰范防禦氏范無

子又贅宋四門教授吳氏子從明字公亮承其家而嗣其業南渡後自汴徙家杭之東青門從明生德誠提領平江監學德誠生仁榮杭州路監學錄仁榮生四子長即觀善也善通經史學不顧工岐黃氏之書嘗讀文正范公傳公幼隨母適朱而未嘗一日敢忘其本生卒復范姓君子反本之道也善隨外甥氏宗于范今將反本於吳禮也已作堂先廬之東名以歸本丐先生大手筆一志庶吳氏子姓有以知水木本源之義也吾悼秦法

子壯則出贅世襲以為風父道不正遂不予其子而子其壻致宗祀不明氏族亡辨有司詔民者又不以釐而正之至使一門沓著戶籍其壞倫紀也甚矣善能反本於徐范二宗之外而亟歸正於吳非讀書達禮篤正之君子其能若是乎哉鐵史筆之故吾樂與之文使代之不肖子姓蹈秦風之痼弊者有所儆也夫

送于師尹游京師序

士有學周孔之藝者不幸不薦于有司而其志不甘與

齊民共畊稼則思自致于京師不幸其藝又不偶始不免資小道干王侯以冀萬一之遇者十恒八九若星風之占支干之步色鑑骨靡以及瞽巫妖祝驅丁役甲丹沙黃白水火之術凡可以射人隱黃人惑一詭所遇者無不屑為焉而其近儒道為貴官徹卿心敬而身禮者則無出於岐黃氏之伎也蓋岐黃氏之伎司人死生命而百家衆伎之莫能尚也高自獎其道者且曰上醫鑒國吾嘗在京師視岐黃氏之流封閤笈中藏擁侍女從

百金馬王侯庭中或出入禁掖無所顧忌小則要金千  
賚大則要暴位顯要不以一旦踈賤為嫌也嘻若是者  
豈吾道之左使然耶抑公卿不樂於正薦士之所致耶

先生曰讀至此不一  
唱三嘆非知言已

天台子師尹與其兄舜道嘗從余

游舜道以經學中進士第而師尹連不得志于有司今  
不遠萬里遊京師來丐予言以別予曰師尹懷才藝不  
耦于時何分於中外彼此哉師尹曰儒伎不利吾旁狹  
者岐黃氏之伎也不耦於此將有耦於彼乎予悲其藝

成而未利而壯其志之必有成也於是乎序

送沈均父序

予友漕使拙齊公為予談太末有奇士曰沈平氏字均父自號自量宋少師某之七葉孫也其為人斬斬有風操人有過面折之疾浮屠氏如糞蛆明經試有司弗售即焚棄舉子伎以岐黃術自隱至正中境有桀民弄兵者守將莫孰何君起率鄰邦大俠合券甲用剡垣摠戎令禽之若狐兔盡夷其穴巢一邑賴以安又龍邑令翟



某者貪吝與豪斷民相根株齟齬其民無屬賢君件其  
狀走部刺史白之翟與根株連坐徙實邊人稱快佗墨  
吏見君曰此白衣言事生也吾聞而異其人無幾何君  
游松相見視其貌若狂而中精悍無敵質所行為不誣  
宿留九山月餘別去松人士能詩者歌以餞之而以首  
屬余余以士有匹夫而任人倫世教之重一言一動切  
於救時如負祿位者謂非毅然豪杰之士不可如魯仲  
連郭林宗石徂徠其人是已世降以還士氣不作代果

無若人乎吾於均父見士氣之猶古也嘻世有任人之  
言責往往為瘖蟬伏馬而吐不平者乃在巾澤之士世  
道不幸亦世道之幸歟後之求均父者於吾文有徵其  
得以詭托者信為扁倉流乎是為叙



東維子集卷八

# 欽定四庫全書

集部

東維子集卷九

詳校官中書臣孫衡

中書臣劉源溥覆勘

總校官進士臣繆琪

校對官編修臣莊通敏

謄錄監生臣莊承簪

欽定四庫全書

東維子集卷九

元 楊維禎 撰

序

送周處士還山序

余讀魯莊公之春秋未嘗不義曹劌之爲人也劌非魯  
之在位大夫也又非魯之疇人鉅室也公將與齊戰在  
位者子言而劌士見公開說戰論劌宣懷利以要君盜

名以奸世乎魯為齊弱誠不忍其君將或北而其宗社之或僨也噫使魯在位君子皆如劄之憂為其君深謀而遠計魯有不霸乎長勺勝齊之後劄遂為大夫矣君子賀魯之有劄又賀劄之言効於魯非要君以奸世者也南州處士周靖氏當紅賊陷吳興上戰守之策於統兵主將將聽其言而未用參相楊公舉其人以為可以置之樞機之地薦章數上處士又拂衣而去夫處士豈有要於君奸於時者耶參相之力舉處士也亦豈有私

於處士耶將用劓於長勺之後也處士不受薦辟至拂  
衣去則有信其非盜名懷利也稔也處士道過杭北門  
出所陳策見予予喜其言已達於時之君子也言之利  
不利不在已而卒返諸故山處士將不得班於曹子乎  
一命之榮不足為處士賀予將賀其言有效於時之君  
如曹子之效於魯也於是乎書

送鄭處士序

朝廷選用文武吏於大小無位無以稱選則下詔丘園

慮有傲世而去者求之如弗及獅山處士鄭子美氏隱

居山中四十年言者聞

關

朝廷

關

用起之中使詣門

勸駕者至再而處士起就道所與游者自吳詢而下若  
千人咸為歌詩以送之又屬會稽楊某為之叙某辭不  
獲則將有詰於鄭子者嘻今之舉逸人非太平文典已  
國家失太平五六年吏日不遑支民日不聊生也始急  
俊傑於在位之外鄭子挾何術往嘻淮之右江之左冠  
之挺禍者不狹矣子能帶劍挺鉞出入戎馬轉關數千



里使兵不知疲而敵不知禦乎曰未能也寇無臣主阻  
山負海各據要害以稱孤長子能單騎至其所談笑而道  
之使即投戈倒幟復為良黔首乎曰未能也哀哀生齒  
路死鋒鏑復死征斂子能弔死存疾徠流亡安反側使  
復有更生之地乎曰未能也未能子與今在位吏畢為  
廢物縣官責名將不利處士鄭子栗然起曰贈吾言者  
盡頌未有如先生稱詞之危也幸先生有以教我於是  
舉酒申之以祝詞詞曰安危成敗料如著功過賞罰信

若時主弗貳臣臣弗欺離以獨照驥不匹馳小人退兮  
君子以大來叶填九鼎豎四維狂流橫潰兮仍東之持  
國是兮臣所職叶臣不職兮神聽之詞畢鄭子再拜酌  
酒酹輒而行曰所不知規者有如輒

送王熙易客南湖序

軍興仕者弗由中出多由外便宜版授版授者不時祿  
食則陽陽而去矣其人也進無祿仕退又或失其生產  
生事眊眊焉不獲置其身於有所雖賤夫賈販富人相

幹肩為又甚牙校權貴之貴依憑根穴以持郡縣短長  
武斷脇制而後可以裕一身及一家之養吁此士下下  
之為也去盜寧幾哉高等者無祿則歸畝爾晦無以歸  
卧山蹈海為魯連子為夷齊子爾有甚不獲已挾技為  
門下客而技亦傳者之技也不然去賈幹而下又幾哉  
東州王子熙易有仕才而無所於仕為貧而起則將有  
版授之者又以虛役無廩食之及則去而挾其技為宛  
陵南湖之客南湖蓋今禮部貢公之所家也南湖給告

歸休業又上覬王子之行出其招而往也願未知王子  
執所技往何出王子曰噫吾技父師教吾以聖賢之技  
也將使貢公相天子不欲食於農不資兵於盜不以物  
估賤楮價於天下之民而已矣舍此求吾去賈幹而下  
者無幾吾為魯連子而已耳夷齊子而已耳余偉其言  
與其執技遂叙以別且為告南湖曰南湖不舉客則已  
舉客當自王子始

太史印譜序

予嘗悼字有戴侗六書故而四目之文始鑿矣幸不鑿者存頤之十五篇字凡百四十為篆籀本又不幸為分韻所鑿字有入者矣如鏐鏐鑿鋸竈入鍾鼎河桁澍餽又續入圖經隱訣諸書四目氏之法至此誠一厄矣齊郡太史子玄氏博古如子產識字如子雲嘗續注爰歷埤雅是編則漢魏晉唐官私印文也摹印在八體之一則是編去古為近然吾觀漢文多簡古雖篆亦與隸等無枝脚之蔓及觀唐文宋文皆有衍出於繆者豈漢

文去古尚近而唐宋去之日遠日繆耶抑漢士識字者多而唐宋識字者少耶吾於子女問之子女曰馬援武材也上書言伏波印文之說下大司空正郡國印章則先生云漢傳識字者多信矣雖然有吳延陵君子之墓孔子之書僅六而已而四文翔入蓋又漢人益以方篆之體假聖文以欺後人耳予於漢人不能無憾而於唐宋又何責焉遂錄以為太史印譜序

西山序

東陽有蔣君子者家在東畫水西峴山之間家之西又  
闢地理泉石華竹曰沱曰谷曰屏曰洞曰亭壇臺園其  
凡十有四所總而命之曰西山別墅君時時輿太夫人  
者燕游其中或與東閭西里仕而歸者飲酒賦詩以樂  
其樂也其攬物為詩凡若干首自金華先生而次和其  
詩者又凡若干首好事者遂圖其墅裒其詩而求一言  
於會稽楊子楊子曰嘻嘗品人地於西山吾有其論西  
山有薇食周餓夫而餓夫之特立獨行師表百代者實

無負於西山周以降山出爽氣以納乎韻人之抱世以  
王馬曹柱頰當之然馬曹者不得為餓夫之清而徒清  
於譚馬爾事不料理高視西山曾無裨於典午氏宗社  
之廢西山負馬曹馬曹負西山耶蔣君子者有仕才而  
不仕蓋幸生承平之世與餓隱時異不敢詭高於食薇  
願行其素於西山耕穀蠶絲足以養吾之身華草月露  
足以養吾之心職於孝者以事親職於義者以奉賓視  
西山之為晴為雨為霏為爽皆吾之四時朝暮被吾聲



歌者一草一木咸有德色是又君子之素不必強同於  
挂頰者之云嘻持吾論以品人地於西山若蔣君子者  
西山何負於君子君子何負於西山乎予未識君子繇  
金華先生識之未游其墅繇先生之詩若游之於是乎  
叙

送如一翁歸曲江草堂序

曲江錢如一翁自冠年工五字詩及七言大章嘗以詩  
經義領鄉薦而不償于祿仕人咸稱其詩詩似杜其平

生艱窶阨亦近似之草堂錢塘即曲江也如一應辟  
藩閭者二十餘年仰給升斗孔子廟草堂亦荒矣少陵  
避亂于郾轉秦州流落劍南蜀錄事王司馬輩為之脩  
起至宋呂相鎮成都又為作草堂故址繪先生象於中  
翁數嘗寇亂今亂定獲歸錢唐第未知草堂不為風雨  
所破則為戎馬所躐躪果無恙否吾聞今浙垣大一辨  
章朱公方偃武事延致舊德碩儒俎豆於雅歌壺矢間  
太平有象於此乎見車騎虛左或過翁草堂問風雨無

恙即有恙不有脩起於錄事司馬者其不為翁重構如  
成都呂相乎果爾相國之尊賢為不誣矣吾於如一之  
行卜之

風月福人序

白樂天晚年歸休洛中娛老者琴歌酒賦有鄧同韋楚  
元劉為唱和友蠻素容滿為樂酒具又有晉公為雅道  
主優游蔗境十有餘年身不陷甘露禍輒自謂福人然  
其詩有病與樂天相伴在春隨樊子一時歸則其懷抱

猶有惡者吾未七十休官在九峰三泖間殆且二十年

優游光景過於樂天有李

五峰

張句周

易

錢思

復

為唱和友

桃葉柳枝瓊花翠羽為歌飲伎第池臺花月主者乏晉

公耳然東諸侯如李越州張吳興韓松江鍾海鹽聲伎

高讌余未嘗不居其右席則池臺主者未嘗乏也風日

好時駕春水宅

先生舫名

赴吳越間好事者招致效昔人水

仙舫故事蕩漾湖光島翠望之者嘖銕龍仙伯願未知

香山老人有此無也客有小海生賀余為江山風月福

人且貌余老像以八字字之又賦詩其上曰二十四考

中書令二百六字太師銜

魯國太師此二句本先生句也

不如八字神

仙福風月湖山一擔擔天年直至九十九

先生四世祖揚佛子享年

九十好景長如三月三

先生嘗自言遇憂不憂遇病不病遇喪亂不喪亂胃中四時長

是春也故自號嬉春道人其居寓曰春不老有嬉春小樂章一百篇

小素小蠻休比似

桃根桃葉尚宜男

先生八十精力不衰滴翠尚有弄瓦弄璋之嬉

余和之云紅

兜羅巾白纈衫金鑾致仕得頭銜家無撲滿誰從破世

有缺枷人自擔黃白未嘗傳八八

陶八傳丹與顏真卿

龍蛇奚用

辨三三人間黃閣在平地付與西京妄一男

全不為險  
韻所縛先

生嘗曰有才力者  
韻愈險句愈奇也

### 送朱生芾蒲溪授徒序

余讀漆園叟論士有六好六好繫於已亦係於時余丁  
時變且老矣無能為矣不能擬於朝廷士尊主強國者  
則亦願脩仁義為平世教誨者之歸若刻意尚行高論  
怨誹為亢如鮑焦介推申屠狄之徒決弗為已吾門朱  
生芾與余同懼喪亂而不得安於所好者負書劍來別

曰某得七寶瞿氏為西席主庶幾以學于先生者施于人敢求一言以為別吁芾以仁義為脩處亂世而得為平世之士遂其願於吾願之未能者非吾道之幸歟芾往哉益慎厥脩無効尚論陷厥亢

送韓諤還會稽序

安陽韓氏自宋魏公至今凡十世散處北南者代有賢子孫如諤者其一也諤不特以世家稱於人尤以好古博雅稱以清脩敏學稱其燕處之室曰讀易齋云入其

室者不問可知其為文獻故家子姓也廼隱居西湖之上與伯雨張公為師友學益進行益脩重為之喜而畏焉願視鄉之出而仕者離親戚棄墳墓將以榮身及家也不知他變日可畏名一挂牒書者如挂臬籍錮而禁可也放而竄可也斧鑕而拏而族可也思一返其故鄉非其君哀其老而憊憊而瀕於死乞與休告則法亡得而去也今君道尊於身心泰於世進退自如駕一葉舟絕江而東也歸拜其鄉之父兄師友塗迎門候獲見風



采者如見神仙吁其得錮而束之乎放而逐之乎斧鑕  
而拏而族而僇之乎於其歸也其不憊而慕之乎抑吾  
聞鄉之黎老人民非者已過半而城郭亦非其舊矣君  
於風露之夕馭鶴於小蓬閣上賦海嶠之詩得無有同  
聲而應過城頭話甲子詔時人以學仙而去者為我志  
之書者為何人夢道士而飛鳴者又為何人老鄉客楊  
某在由卷之寄寄巢書

贈榔工王輔序

嘉定王輔世業七子技輔自幼機警聰記強識能誦余  
古歌行百十首介其鄉閭翁先生拜余草玄閣下自陳  
曰輔承周左轄公贈以柳耕二大字人遂以柳耕道人  
呼輔敢乞大人先生一言以發之先生咲曰子以鑷代  
耒豈果知耕者乎雖然世以不耕為耕者多矣漁以釣  
耕賈以籌耕工以斧耕醫以鍼砭耕卜以蓍蔡耕兵者  
以弓刀耕胥者以聿櫜耕伶者以絲管耕游說者以頰  
舌耕浮屠氏以梵唄耕老子氏以赤虛耕神仙方士以

丹田耕高至於公卿大吏以禮樂文法耕耕雖不一其  
為不耕之耕則一也豈止輔之櫛也哉然余有詰於輔  
曰爾櫛之耕耕於田叟野姬而已耳亦嘗耕於薦紳第  
一流人乎輔曰輔蟣蝨漢耳烏知第一流人乎萬一大  
人指教之余曰代有中秉釣軸外攬英俊納天下於太  
平之域者髮嘗一沐而三握之子以吾言往拜其履進  
爾櫛以握其所三握者為余祝曰中國有聖相越裳氏  
之雉其來矣輔再拜領言去

陶氏菊逸序

毗陵陶氏前朝文獻家也在宣和間有為翰林檢閱者  
某扈駕南渡其五世孫為澹圃君某仕常郡教授因家  
毗陵國初以宋遺老徵不起家庭顧師竹山蔣公教子  
弟時石田馬中丞公實從學其家與其孫靖為同窓友  
馬在南端薦授之靖無仕宦志乃法陶朱治生產饒於  
貲禮賢養客無所愛吝親故有急者調之死者棺槨之  
鄉稱義士至是四世同居一家千有餘指孝友雍睦人

無間言兵興毗陵陷其子澤與兄和者奉母孝徙居吳  
下和隱迹於燒墨澤亦托菊自號曰逸民司徒隴西公  
聞澤才行固起為參佐不獲已應命未幾辭以歸更折  
節下帷讀祖父書家無飢儲晏如也今東遊海上尋菊  
泉於谷洲訪余老圃更生及傳延年者酌酒賦詩為樂  
別去索語以贈為叙名節而又為賦詩菊逸之歌歌曰  
菊之澹兮北門之秋菊之靖兮栗里之丘菊之逸兮審  
夫去留老余圃兮海之隈飲菊泉兮谷之洲徼斯人兮

金匱要略卷之九  
吾誰與儔

淮海處士壽冢募資序

吾聞古不預撫墓後世有預撫者稱為達生若夫作長室以燕容其中者范子敬也作壽藏以圖前哲與之相主賓者趙臺卿也是則預撫墓為幽宅計者非達生之士能爾乎然有達生而欲效范趙之為者力無及焉吾恐未免相率為囊引鍾埋之流也淮海處士錢子材先生以光陰為百代之過客齒且老矣而不以死為諱欲

買不食之地豫營壽藏非取資人不可也昔趙秋資人之不能葬者獲他日餅金貴富之報處士受拖於抔土之恩他日豈無結草之報乎吾貧無以贈故贈此以爲仁人義士之告庶相與資之以成其達云

### 葉山人省親序

客有談金華葉山人之爲差者

音沱

曰山人方士也善公

孫娘舞器又曰山人方士也工鴻寶枕中又曰山人從衡士也小年嘗挾策北走燕南走粵東西吳蜀也又曰

山人義俠士也張吳氏以偽爵屢要之屢不應惠粟帛及門轉以散民之操乞瓢者有弟為兵所殺又掠其子山人仗劍要於途而還之此客之議其差不得名其為人也一日服道來謁東維先生於草玄閣自陳曰某幼從許先生門人遊長又獲登侍讀黃先生門遭時喪亂家窶慈母逝嚴親且老出山謀祿養而祿不可苟奸今五十其齒矣將歸故山無以見其親奈何奈何幸先生賜一言為某終身教予惟其人生許黃之鄉承師友講



習之素不為無學者顧乃泛焉無歸如弱喪者吁亡羊者多歧亡術者多學宜子之書劍弗成吏隱兩廢而徒取差者之議也吁壯士者傷秋孝子者愛日傷秋已往愛日方來子其亟歸庭前風木當有曾子之所侍者堂上菽水獨無子路之為懽者乎子其亟歸勿復孟浪蹈差人之議也子居與金華為隣邑異日聞烏傷山中有葉孝廉名應天庭之聘移孝作忠為大明名臣吾有望於山人山人以吾言勉之

送琴生李希敏序

先王作樂必有以動物而後有以協治也其本在合天下之情情合而陰陽之和應陰陽之和應天下其有不治乎有虞氏之鼓琴也南風為之解慍而阜財師曠氏之作清角也玄鶴為之長鳴而迅舞聲之動物捷矣至下鴻漸杜氏之奏羯鼓也猿鳥犬羊亦為之躑躅如其疾徐之節則具聰靈以為人而有聞樂不動者乎不然則其聲之感人者未至也余來吳中始獲聽泗水楊氏

伯振之琴於無言僧舍余為之三嘆不足至於手舞足  
蹈歸而求之尚覺余人之流通也吁亦至矣哉以予之  
有感於一日之琴者如此則知先王協治之音動於物  
之捷也不誣矣後之以琴過我者無慮百數而未見有  
楊氏之至也晚得李氏希敏氏庶幾其近之生自喜其  
工之至有獲予賞識也持卷來求言遂為書先王協治  
之盛者語之抑聞先王之教琴必配瑟以和陰陽也禮  
稱君子無故不徹琴瑟詩曰如鼓琴瑟又曰琴瑟在御

知古之琴未嘗獨御也蓋琴統陽瑟統陰伯牙氏鼓琴而馬仰秣瓠巴山鼓瑟而魚出聽魚陰物馬陽物也陰陽各從其類應琴瑟毗而後陰陽和陽不可獨而無佐也今之士以琴自命者多而未有以瑟鳴者吾將與子求海上師以學焉庶不畔詩禮教而先王協治之音其或可以見也歟

送墨生沈裕序

墨玄造之以色也藏於晦而暴於久者莫尚於玄而墨

玄之用也然藝于是者有工拙焉工者玄之用也愈久而愈通拙者反是此墨之藝有絕稱於世也其犀利可削木其清勁可入水火而不化天下傳為寶而賞鑒者隔物手之而可以知其為天下之精絕也吁藝乎墨者其可以妄庸之工得之乎三衢沈生裕自其大父東舉子代為墨以絕藝繼古聞人之稱故裕所傳若有心法之秘者非人之所能識也李氏父子墨近來為貴至久而後黃金可得李氏父子墨不可得東舉之墨已不可

得而欲所傳欲以目前賤之也豈為知墨者哉裕以所  
製蒼壁贈我且乞一言以發之故為道其傳之達工之  
絕者使人知裕不可以目前賤之其遊京師也且俾持  
余說見於同鄉黃集賢同年趙禮部則沈氏之墨不俟  
久而貴也必矣至正八年春二月序

贈筆史陸頴貴序

韓子為筆作頴傳頴莫貴中山之毫漢制天子筆皆用  
兔蒙恬以鹿毛為柱羊毛為被歐陽通以狸毛為主覆

以兔毫則知頴不獨貴於兔也宣州諸葛氏傳筆有二  
等高貴者柳公權求而與之又語其子曰學士能書當  
留此筆不爾請退還未幾果退還即以常筆與之蓋高  
貴者非右軍不能用也石晉時有奇士夜傳佳筆曉出  
闔戶以竹筒銜壁外人置錢其中佳筆躍出筆其筆床  
曰頴擅名于館閣諸公者久矣至其孫遂以頴貴名焉  
常以豐狐之毫或麝毛湏製以遺我且曰史錢史錢心  
穎也予用之勁而有力圓而善任使舍其製而用它工

則不可書矣故餞心之頴人罕得之而人亦不能用也  
其以頴自貴何以異於唐諸葛首奇士哉予舍其頴之  
可貴而又能自貴不以輕信於人也故為序以贈使世  
之大手筆知其自負所貴非吾溢美之也至正甲辰夏  
五月朔序

東維子集卷九



欽定四庫全書

東維子集卷十

元 楊維禎 撰

序

高僧詩集序

三山雷隱禪師予以師友之者幾二十年其謝事歸隱于蓮峰也嘗以本朝詩僧之作委其選輯自端而下凡若干人時詩凡若干首持來徵序孔子論詩可以興可

以觀可以羣可以怨通之事父遠之事君多識於鳥獸  
草木之名夫以浮屠之教棄倫理而宗空無其為書又  
務為宏濶勝大之言無有興觀羣怨之事鳥獸草木之  
情而何有於詩然自吳興沙門晝以來不以空無為師  
而以詩文命世者代不乏絕錯以成章非徒侈乎風雲  
月露而尤致君親之慕其與吾魁人碩士往來倡和因  
時以悲喜隨事以比興者風雅宗焉是其人雖墨也文  
則吾儒非墨而空無世之大夫士招而歸諸同文之代

不為異也昔歐陽子序秘演之詩以為秘隱於浮屠與  
吾石曼卿隱於酒皆世之奇男子也第未知雷所選之  
上孰為今之奇男子吾老矣於吾曼卿之輩未能見隱  
於浮屠者或見之吾將與雷從之遊

冷齋詩集序

曩余在錢唐湖上與句曲外史五峰老人輩詩推余詩  
為鐵雅詩雷隱震上人復原報上人傳余雅為方外別  
派繼又得祁川行已方上人齒雖少氣則盛才則宿也

持所製見余曰錢龍玉鸞二謠鏗然有金石聲余已竒之今年至祁上上人出冷齋全集求余評內有和余古樂府題其辭多警策余益竒之嘻可與震報同列吾派矣余觀上人之才蓄天地藏而又採諸歷代之載籍者日積而不已而終惜上人之才不用於邦國而用於山林與二休輩爭篇什之工也雖然余聞太保劉公沙門出也大中忻公又以文字禪動黼座一言一行皆有裨於世主吾儒流偉之上才績日懋聲華日大將簡知上

所不得與二休輩較篇什工拙而與二賢者相頡頏于  
九天之上也余有待焉上人勉之以徵余言之不人妄  
也

雪廬集序

宋南渡後大夫無文章乃得於高安上人圓至者方嚴  
陵有是言也始予恠其言之自薄及取至文覽之則於  
江子參寥輩誠有過之者其脩辭有古作者法吾中國  
聖人與西方聖人有合不合者二之則不是一之亦不

然則必推極初之母者言也善夫至之能文也至後未  
有接之踵者閱七八十年而得江在外史新上人余老  
友劉海持雪廬一編過我徵序言觀其脩辭幾近至而  
論道亦似之其曰佛以神道設教以輔國君治本使民  
從化不俟刑驅且贊今天子以西天佛子為帝者師  
所以崇其治本者耳善乎新之言佛道道之返其初於  
母也其勉人必以問學思辯以行其道而振其教則其  
文非穿空鑿幻務資口吻於人我者也於是命筆胥錄

其編凡若干首使與至文同梓於肆云至正丙午夏五月朔日抱遺道人書于雲鉄史藏室

竺隱集序

季代儒者談浮屠氏學十八九而未見浮屠談吾儒者自晉慧琳推吾白學貶裁其本教逮唐有衣冠外臣曰一行宋有上天子書曰契嵩我朝有筠溪牧潛之集曰至鉢陵蒲室之集曰忻歷千餘年僅僅四五人耳江左道上有編曰竺隱余喜其吐辭運旨未嘗有本教濶

大不經之言其雅頗近韓暢近歐而簡白近太史公求之浮屠文中駸駸乎爭駕牧潛而於蒲室也殆將過之此余較其格裁而言究其論道則其不合吾道者亦蓋寡矣道嘗以書來曰吾子執文柄乎鐵史寸善必賞不在人求不善而受議亦心服無憾故道以不腆之文不自知其合道與否印子一言余自離亂棄官十餘年以觚簡著作為事絕交于勢要而一時方外有文句近古亦收而錄之而況有文不畔吾道追古作者如竺隱編



者乎樂為援筆而引諸首不辭

一漚集序

雲間釋訓師受業郡之普照寺丞事天竺如庵真公玉  
岡潤公入徑山得直指於元叟端公洵謁大士鷹窠僧  
迦淮泗尋一有於毗陵姑胥末參獅林天如子今歸老  
故山之化城築別室為燕休所自命曰漚隱錄其平日  
詩偈題曰一漚草者凡十卷求余一言傳諸其人且曰  
為人膾炙者元叟派外有吾鉄雅派焉晚年詩律益嚴

礪唱余和汝者與吾門八駿爭後先吾聞東山空法師  
有詩入陳黃派後自以為齊已貫休不得祖師圖者詩  
累之也從而自諱焉余亦曰師有伽陀妙天下又何必  
詩詩又何派自其集而觀之感化齊物傷今弔古背漚  
之醍醐甘露探其學則讀吾輩書多於貝葉鈔故其託  
物比興者吾風人之情而觸物悟身者其內典之教也  
姑舍勿論吾與師論漚旨漚之生何生滅何滅余嘗讀  
師海月祖象謂月之景光在月乎在海乎海月不在海

而海且何在乎知海月之無在不在則知漚之在矣師  
起謝曰吾之漚可一而萬萬而一矣遂書為序使人知  
師之上祖師圖者固自在

### 三境圖論序

余讀經子九流之書恨有未盡而身毒國之書鞮譯于  
不可誥者固有未暇杭之淨性寺主僧無為師觴余東  
塔院談出世法初聞其說婆內蘇迷廬外為七金水為  
四州東為弗菩提南為閻浮提西為瞿耶尼北為鬱單

越地各袤數十萬由旬又曰持地山外為香山雪山寶山山上有池名阿耨達東北山水至積石山潛流地下為黃河之源以吾聖元幅員之廣西極河源東盡震旦窮步章永不能萬由旬而此日月世界不知在鬱單越耶閻浮提耶又曰日琉璃寶廣二十四百有餘里天子天民居之月宮水晶寶城其廣如日天后天女居之不知二千四百有餘里宮城之內誠有陰陽晝夜乎有則又孰為之日月乎又曰念振者性之原即命也人天性

地獄性一念別爾彈指頃見三十二億百千念念念成  
形形有識以吾天命之性未嘗有地獄不知一念為人  
天為地獄可為性原乎又曰牆壁瓦礫具有佛性瓦礫  
又有念念不乎又曰千物出後世却乃壞天地生滅在  
菩薩一吹唾中未知菩薩之力有吹而成孰與不唾不  
滅使之為無生滅耶而又使之不能不滅於十二萬斯  
之後何也余時未辯所言即嘿嘿別去明日師復謁余  
即次出所著三境圖論其論所演不出所言者其圖又

曰因境生象因象生見生想生道余為披圖誦書蓋有  
不得其續師且過索余言為引重余孔子徒也言不相  
謀得非云者有非其徒所能決回必將決於言不相謀  
者邪夫苟合卦體於八佛之道者易之罪人也故余為  
錄其言以啓折中者引于弓之端非苟合也抑余聞中  
土三寶有象四十二有章實身迦景摩騰竺法蘭始今  
三境有章又自師始也貪佛者欲不爭傳競習而得乎  
嘻使三境者誠灼灼不誣其罔諸法度羣想出大允而

優入乎四聖之域者當無勝矣則是書非台祖之宗子  
外道之金城四十二章之羽翼騶乘歟師名並學自號  
無爲子台盤石人脫白于杭之芝阜受天台旨于知先  
今主淨性寺云

瑞竹圖卷序

竹見於易於書於詩於周禮易言卦象書言地宜詩比  
德君子禮述器於樂也而未聞以瑞言者然竹心虛虛  
故靈故與人心徃徃有感應之機娥皇女英哭舜於三

湘之野而湘竹為之斑然漢文帝孝於母而子母筍生  
白虎毀唐隴西地饑而竹為結米如粳實民賴以活者  
百萬數蓋湘野之文義所感白虎之萌孝所感隴西之  
實仁所感竹之靈若此謂非瑞應可乎雲間心海上人  
植竹於庭而有產雙莖並幹者雙莖並幹不常得於有  
竹之所則歸之海瑞應亦可也或曰心海為沙門之民  
不染於物者烏有所謂仁義孝節之所感庠子曰人情  
物狀世容有偽惟天出之物不可以偽參也物不可以



偽參則不可以為動物於天出者其必有以也夫其徒  
虛碧氏為繪竹形來求予言以記不朽上人高德余未  
知而信其動物者故為志之且使其徒之物我之相感  
應於理者不可以離而去也至正十年十二月朔旦序

毛隱上人序

客有沙門以金錫杖荷青襪索謁余雲間次舍者問其  
出吳興儒氏子也問其業縛筆也余恠縛筆非沙門事  
則曰余祖禰業余弗忘其先也且自矜生而頡悟六歲

善讀書史日記萬餘言長而善草隸詩書誦於父命為  
浮屠而俚浮屠惟以習歌咀擊鐃考鼓利人死喪為事  
無所用吾苦書記者遂服先業自號毛隱蓋將附穎而  
逃吾浮屠氏之耻也且可挾以見世之賢人君子如閣  
老青城先生尚及見之而喜余之為且貽余以詩今幸  
願見夫子也竊嘗誦夫子三史統辨數千言至今口不  
忘余覆其流誦沛然若大江之奔決無少哽也於是異  
其人曰人生之初受鬼於陰鬼盛者多善記昌黎伯稱

毛穎善記亦豈非以其明昧之裔犇月合太陰之精受  
龜為尤盛故爾耶上人以毛隱自號非徒欲祖穎裔而  
又將傳穎心至於博纂洽記述為文章資世之賢人君  
子以文明昌天下乎不然何舍子浮屠事而復其先業  
以僕僕走文章家之門乎若是則上人之志有所鬱而  
未信可知已用上人之伎者毋徒用於字書官府市井  
貨泉之註記釋老巫覡之書鈔而已也抑昌黎言毛穎  
有時而禿不任事遂以詩老退且有中書不中之議吾

將還子顛毛返子儒衣冠萬一列諸鴻生碩士聽受指  
畫俾免冠之際毋得以老退議子以為何如上人避席  
載拜曰夫子倘有意拂拭我我將加巾冠載筆以從至  
正九年十二月叙

自跋曰余為此文后上人者遂幡然為賈浪仙故事  
言之不可已也如此儒之才日衰折而入浮屠家如  
毛隱者多矣

送用上人西游序

金僊氏之教上為坐次為遊下為誦習也滅去運息歸于頑空坐而得之聞觸知覺會於真原游而得之誦習者一出一入之學耳然其游也不趨乎靈山勝水之聚求即夫大浮屠之神者耳目其聲光則亦僣僣與販丁役卒等爾四明用上人蓋有志乎浮屠氏之游天台廬阜羅浮南嶽蓋嘗徧歷焉將自虎丘達金陵馴致乎五臺之山其徒自妙聲而下凡十餘人贈之言而去又持其卷來請予一言蓋上人由吾儒而學浮屠以為浮屠

濶大之言以誘愚非以誘賢也故又未忘於吾儒之教  
蓋吾儒亦有游矣孔子轍環天下太史公歷覽天下之  
名山大川孔子不游無以成春秋太史不游無以成史  
記吾嘗見浮屠氏之文史矣擴諸外學輔諸內典者曰  
橘洲曰石門吾誦之予之大抵得諸游耳上人之學得  
諸游他日東歸有所見予語言文字足以繼石門橘洲  
者不屬之上人誰屬乎不然僕僕乎與販丁役卒等者  
固汝教之所無取也上人尚以予言勉之

送照上人東歸序

四明水山與天台並秀說者以比海之方丈蓬萊則其  
鍾為人物宜有清明俊傑者出以應時需也國家開  
鄉選法已三十餘年而破選之荒者僅史駟孫氏程端  
學氏而來者無繼焉豈其人好隱逃浮屠而去者不少  
耶以余交浮屠南北之秀凡數十人而明亦寥寥無聞  
焉晚始得斷江恩師繼得照師覺元才之難也可知已  
照且不以才自止從游於吾門稱方外弟子連日夜記

書數千言屬詩文若干首孜孜自課以為常故其行脩業進今日與昨日之不等夷也獨惜其學成終歸無所於用不得應吾盛時賢良之選以接史程氏之躅君子不獨為明之才難惜也秋高東歸來別曰照也有母焉久不覲心感感焉矧先生篤倫紀之教敢辭而歸予益歎照之性近於道而才足與有為也使照還鬚髮加冠巾有祿位民上其不篤吾倫紀之教以行先王之政者幾希以明得方之難而僅得如照者又逃於浮屠而未



知其返也故送其去余甚惜之而申以告之

送象元淑公住持南湖序

予嘗論浮屠之教足以裨闔宇宙玩弄人世歆豔王公  
大人遂以法門位吾孔子之次非徒以閎濶不經之文  
亦其徒有異比丘至靈甚睿人仰之若古神明者得之  
皇帝既定南京奄有朔服以天下版籍不白浮屠民  
脫兵而遺者十不一二徵賦動力疲於上農夫斃版築  
以萬萬計已而高望鴻德者示化顯神於不可蹤跡之

中天子聞之為之動色太史氏錄其人使有所考重選  
精進閣梨立大壇塲設人天佛事主以天界大龍象教  
門貼仆而一日起立吁是孰使之然哉南湖在秀當兵  
車使駟之衝兵燹後穹殿湧堂已入焦土其徒縮以痺  
蓋僅如逆旅舍佳山者代難其人矣象元師由杭之大  
名輒以陞茲座吾聞其人於元叟雪窓古鼎之間已久  
顧今齒愈夙才愈老道愈神其於秀王勝地起廢補缺  
完而大之使文布述粲然如承平時是不難者至其妙

通大知識一言一動有以上贊大明之化靈跡異迹  
照著一時俾王公大夫仰之為古神明如前所稱則其  
教也當與吾孔子之教相表裏西方聖人之道誰得而  
廢之吾以勉象元而還以自勉青龍集戊申冬十一月  
二十有二日序

送蘭仁二上人歸三竺序

余在富春時得山中兩生曰蘭曰仁天質機穎皆有用  
世才授之以春秋經史學兵興潛于釋來游雲間別余

曰釋氏有衡台派由北齊悟龍樹三觀法以授南嶽南嶽以授智者智者因悟法花之秘於是約五時張八教總括羣籍歸諸一宗復述止觀書教理既白觀行兼明以是傳之章安章安傳之法花法花傳之天宮天宮傳之荆溪而其道大脩會昌之厄教帙亡去吳越王求其書於海國得諸高麗觀師四明由之而中興三竺由之而弘演猶孔聖之道由河洛而大振由許李而大行儒釋盛衰實相倚伏今丁世變剝毀于兵經火劫厄甚會

昌學者解散遺籍漫然莫從稽正某輩將叅承故老由  
三竺始幸先生一言為指南余謂之曰文武之道具在  
方冊人存政舉人亡政息汝佛之教亦然二子齒甚穉  
志甚宿學甚武能以宗乘與吾聖典合而為一以載諸  
行事以俟昭代之太平吁汝乘不隊則吾道其亦興  
矣乎

送奎法師住持集慶寺詩序

天子即位之元年於浮屠氏之教既立僧省以土賦奔

命京城者以萬計而露殍者三千餘人高德之寂而去者十有二人上命僧統曇師傳錄之遺而得恩歸故山者數十人而會稽方舟奎師由旌德新領天竺之大集慶住持事於是薦紳士及其同袍莫不謂法社之得人予聞主集慶者由宋南峰佛光而下若元之無極宗周天岸諸公皆僧中大龍象而桂子山之蟾兔尚有光也今方舟踵其躅清標古韵之所及吾見桂子之山若增而高蟾兔之窟若闢而朗也於其行也書以贈之同盟

之士歌以餞者係諸後云

送儀沙彌還山序

海內兵變三教之厄浮屠氏為甚壇塔資為烽燎幸存者宿為戍舍沙門之桀至有易廬改服以從山壘野邑毀去幾與會昌之厄等其能卓然自立不忍僨其法門者百無一二大阿蘭若力扶象教又以徭賦同瘦編戶其暇拔漏身譚覺路越濁悟昏以為教乎驪峰余客富春舊遊地也方外友雪舟尊者月一招致至則為宿留

旬浹而後去時沙彌儀年甫十二三侍師左右應對進退一一中軌則余山中所為文三過即能背誦去之十餘年驪峰兩罹兵燹而雪舟亦隔世矣寺之徒日解散儀獨結茅為蓋守其故址而不去今年不遠四百里謁余雲間談山中往事恍如雷比丘夢竟三日告別索一言歸為山靈重吁浮屠氏遭兵不改業又不自償其法門如儀者能幾何人於其來也不無感焉其歸也不無望焉吾老耄未木尚及見驪峰宿草復還舊觀吾復大書



歲月出窟鍾以落之有日期也儀勉之耳同袍曰仁曰  
蘭在雲間者當詩以繫吾卷

琦上人孝養序

韓子曰人有儒名而墨行墨名而儒行者可以與之游  
乎曰揚子雲稱在門牆則退在夷狄則進蓋儒焉而行  
墨者退可也墨焉而行儒者進可也浮屠文暢以慕吾  
道周游天下必有請於縉紳先生之教故為韓子所進  
焉夫彼之教以蔑君親之倫而吾之道以有人倫為教

今有人焉宗浮屠之教而有一旦幡然自外其說以還  
吾道君臣父子之懿也又豈非君子之亟予乎琦上人  
吳之儒氏也自幼落髮為浮屠天平山中壯遊四明雪  
竇見石室禪師深器之俾職記室後浮游淮湘間以肆  
其輕世之志未幾丞相府以東土名宿所推俾主毗陵  
龍興禪寺留不期月忽自喈曰出家以能脫俗而去使俗  
高而慕之以為不可及也奈之何又挂名官府罷送迎  
道路覆為俗所厭邪且余母耄矣即飄然荷包笠尋先

人舊廬於蠡澤之上而先廬敝矣今將築屋一區以養其母而終其天年計未知所出首以其事告予蓋上人嘗以儒行為余友者也今又還天倫之懿職其孝於母以風運其儔輩吳人多孝親而義於成人之盛事聞上人之風其不有勇棄金粟如棄執鉢浮屠以佞土木偶者吾不信也已上人出予言以往吾明年至蠡上將覩子之室突如化成堂上之親無恙且當為子奉豆觴為壽云至正八年秋七月序

闕

氏註道德經序

道之不明也知者過之愚者不及也聖人載道於言未嘗不簡易著明自非不愚之極皆可得而白也故曰道若大路然老氏道與吾聖人之道本無二也引以為異者私知求之之過也於是乎有真無之論要非老氏之本也金人

闕

氏仲寬以吾聖人之學注老氏之書深

諱儒者以虛無以絕滅禮樂以慘刻術數言老子而必欲證其道以同吾聖人蓋其讀老之見有獨至而自信

者爲矣觀其十一章首闢虛實之論與夫真無妙有之  
譚十三章深折滅生脫患之說二十二章極其至精於  
真實信驗三十七章以天下之事相生相代爲理之必  
至五十三章爲備論修齊治平之道八十章爲歷叙至  
治之化以還淳返朴望於後聖之治於此見老氏之學  
非虛無之祖而老氏之道非機謀術數者之所爲也坦  
乎其言實訓詰諸家之所未見也吾於是感無極翁之  
論無即老子有生於無之旨而惜鵝湖諸子之疑於無

者未見

闕

氏之論也其高第弟子為四明董自損嘗

受師旨為同歸論今將板行其師所註老氏經若干卷  
持其編來見予錢唐丐一言以引首予頗是其說故為  
之序云至正六年冬有十月望序

送鄧煉師祈雨序

洪武二年夏旱松陵太守陳府公初下車首詣瞿曇祠  
求雨十日不降守怒欲焚曇象浮屠氏拜以免六月二  
十日壬午移禱于鄧煉師法壇明日移壇公宇守自製

心詞一章告天曰下民六月之旱無伸所求上天三日之霖有感斯應鄧為秦章上帝然後役五雷丁甲呼吸鬼物是日少女風從西北起迅雷一聲振屋瓦大雨如注一日雨二日雨三日大雨足淞民咸拍手相慶曰此府公方寸中雨而非鄧之法力則亦無以成其誠感之速也守命屬吏於琮乞一言於東維先生為鄧之勞先生為叙其事而又侈之以歌曰

東海水枯沃焦神工無處尋天瓢松陵太守閔民苦疾

呼鄧師誅魃妖誅魃妖役丁甲蚩尤鼓風旗倒插搜龍  
龍走白龍潭迅雷夜擘干將匣於乎縣令不積薪將軍  
不拜井爐烟一穗達丹誠三日甘霖雲萬頃君不見漕  
家糧船星火急瓜洲渡頭河水澁蒼天蒼天不悔甌海  
民盡作枯魚泣鄧師鬼工煩叱訶稻田粒粒真珠多松  
陵太守報新政和氣化作擊壤堯民歌

東維子集卷十



# 欽定四庫全書

集部

東維子集卷十一

詳校官中書<sub>臣</sub>孫衡

中書<sub>臣</sub>劉源溥覆勘

總校官進士<sub>臣</sub>繆琪

校對官編修<sub>臣</sub>莊通敏

謄錄監生<sub>臣</sub>莊承簪

欽定四庫全書

東維子集卷十一

序

元 楊維禎 撰

贈杜彥清序

余曩遊海上之小金山泊舟赤松溪上午夜月明如水  
聞水東歌聲累累乎如貫珠已而又聞紫鸞聲穿起林  
樾如雲端仙人披笙鶴而去異而問其人則曰真定杜

清氏之轉喉引商聲之歌間以湘竹之龍鳴也余明發  
開舟不及識其人今年秋再遊海上道過赤松而清來  
相見為余作慢辭古調及秦樓三弄遂出楮求一言以  
別昔賈充在洛會夏統氏之客舟充以會稽土地間曲  
叩之統為歌大禹氏朝會之歌及五胥小海之唱其音  
節慷慨激裂天風雲雨為之響應又掀髯作一悲嘯沙  
塵烟起止之而後已也吾後日舟還溪上約吾竹西老  
人當重叩爾土地間曲如仲御氏之不忘其鄉者豈無

龍山朝會萬國授化之遺音乎竹西當為余協調于櫺  
杪之檀而發余鐵龍之不平者夢寐以之

周月湖今樂府序

士大夫以今樂府鳴者奇巧莫如闕漢卿庾吉甫楊淡  
齋廬疎齋豪爽則有如馮海粟滕玉霄醞藉則有如貫  
酸齋馬昂父其體裁各異而宮商相宣皆可被於絃竹  
者也繼起者不可枚舉往往泥文采者失音節諧音節  
者虧文采兼之者實難也夫詞曲本古詩之流既以樂

府名編則宜有風雅餘韻在焉苟專逐時變競俗趨不自知其流於街談市彥之陋而不見夫錦臚繡腑之為懿也則亦何取於今之樂府可被於絃竹者哉四明周月湖文安美成也公之八葉孫也以詞家剽馥播於今日之樂章宜其於文采音節兼濟而無遺恨也間嘗令學子吳毅輯而成帙薰香摘艷不厭其多好事者又將繡諸梓以廣其傳也不可無一言以引之故為書其編首者如此至正七年十一月朔序

李庸宮詞序

大歷詩人後評者取張籍王建而建之宮詞非籍可能也宮掖之事豈外人所能道哉建雖有春坊才非其老璫宗氏出入禁闥知史氏之所不知則亦不能顯美于是本朝宮詞自石田公而次七慮數十家詞之風格不下建者多而求其善言史氏之所不知則寡矣東易李庸仲常為宮詞四十首流布縉紳間不特風格似建間有言史氏之所弗知如金合草芽胡僧扇鼓漢記琵琶

興隆巢笙內苑籍田室蚕綠事是已蓋仲常以能詩客  
于館閣諸老者且十有七年矣其吏于徽政及長信得  
聞見宮掖者亦熟矣然則代之善為宮詞者豈直愼怨  
興象之似建為得哉觀是詞者尚以是求之至正戊子  
八月甲午序

沈氏今樂府序

或問騷可以被絃乎曰騷詩之流詩可以絃則騷其不  
可乎或有曰騷無古今而樂府有古今何也曰騷之下

為樂府則亦騷之今矣然樂府出於漢可以言古六朝而下皆今矣又況今之今乎吁樂府曰今則樂府之去漢也遠矣士之操觚于是者文墨之游耳其以聲文綴於君臣夫婦仙釋氏之典故以警人視聽使癡兒女知有古今美惡成敗之勸懲則出於關庾氏傳奇之變或者以為治世之音則辱國甚矣吁關雎麟趾之化漸漬於聲樂者固若是其班乎故曰今樂府者文墨之士之游也然而媒雅邪正豪俊鄙野則亦隨其人品而得之



楊廬滕李馮賈馬白皆一代詞伯而不能不遊於是雖  
依比聲調而其格力雄渾正大有足傳者邇年以來小  
葉俳輩類以今樂府自鳴往往流於街談市諺之陋有  
漁樵款乃之不如者吾不知又十年二十年後其變為  
何如也吳興沈子厚氏通文史善為古歌詩間亦游於  
樂府記余數年前客太湖上賦鐵龍引一章子厚連和  
余四章皆倣鉄龍體飄飄然有凌雲氣心已異之今年  
余以海漕事住吳興者閱月子厚時時持酒肴與今樂

府至至必命吳姓度腔引酒為吾壽論其格力有楊盧  
滕李馮貫馬白諸詞伯之風而其句字無小葉俳優街  
談市諺之陋闕庾氏而有傳子厚氏其無傳吾不信也  
已書成帙求一言以引重因為論次樂府之有古今為  
沈氏今樂府序至正十二年夏四月十四日序

沈生樂府序

張右史嘗評賀方回樂府謂其肆口而成不待思慮雕  
琢又推其極至華如遊金張之堂冶如攬嬌施之袿幽

潔如屈宋悲壯如蘇李具是四工夫豈可以肆口而成  
哉蓋肆口而成者情也具四工者才也情至而此賀才  
子妙絕一世而文章鉅公不能擅其場者情之兩至也  
我朝樂府辞益簡調益嚴而句益流媚不陋自踈齋酸  
齋以後小山局於方黑劉縱於圓局於方拘才之過也  
縱於圓恣情之過也二者胥失之松江沈氏常嘗從余  
朔南士間聽於音往能吹余大小鐵龍作龍吟曲十二  
章遂遊筆樂府積以成帙求余一言重篇端披其帙見

其情發於成於才者亦似矣生益造其詣以小山之拘  
者自通黑劉之恣者自搏生之樂府不美於賀才子者  
吾不信已生讀書強記有誌晉人帖南唐人畫樂府特  
其餘耳有求生之才者勿以是掩之

瀟湘集序

余在吳下時與永嘉李孝光論古人意余曰梅一於酸  
鹽一於醎飲食鹽梅而味常得於酸醎之外此古詩人  
意也後之得此意者惟古樂府而已耳孝光以余言為

雖遂相與唱和古樂府辭好事者傳於海內館閣諸老  
以為李楊樂府出而後始補元詩之缺泰定文風為之  
一變吁四十年矣兵興來詞人又一變往往務工於語  
言而古意寢失語彌工意彌陋詩之去古彌遠吾不意  
得瀟湘集於四十年後尚有古詩人意也瀟湘為沅陽  
唐升氏字伯春自湖湘流離越江漢歷閩嶠抵金陵過  
錢唐上會稽周流幾萬里無居與食然不肯少貶事王  
侯覓知己願容與於吟咏求海內知言以質其所能此

升之見余草玄閣也其詩多傷賢人君子不得志而不  
肖者合於世也其樂府古風謠平易不迫非有所託不  
著至憤頑嫉惡慷慨激烈者聞之足以戒而言之無罪  
矣三百篇以六義見諷刺瀟湘詩人不合於古風人者  
寡矣於是賞會之餘為之評點使覽者知我朝之詩  
如瀟湘者亦可刻金石流管絃豈非吾儕遺老之至望  
哉至正丙午三月望日序

苗氏備急活人方序

醫莫切於對證證莫切於對藥藥投其對牛搜馬渤癩  
狗之寶能擅功於一時不然黃金水銀鍾乳琅玕沅之  
沙婆律之腦蛇之黃中無益其責也餘姚醫學錄苗君  
仲通論著備急活人方會萃諸家所載祖父所傳江湖  
所聞及親所經驗者筆成一編世有奇疾醫經所不備  
醫流所不識獨得於神悟理會而著為奇中之方此其  
難也夫人不幸抱奇疾至於醫經不備醫流不識遂謂  
無藥可治使病者待期以盡不亦可悼也哉妄庸者亂

投藥餌以探疾重不幸速其斃是醫殺之也是書一出  
備醫經之未備識醫流之未識使天下不幸抱奇疾有  
對疾之證對證之藥不重不幸為妄庸醫之所殺是不  
大可慶歟昔甄權不著方書其言曰醫者意也不可以  
著書權蓋以意得者自秘非淑後之仁也君推其獨得  
喜與天下後世共其用心廣狹何如哉鋟諸梓而過徵  
余序於是乎序

杏林序



江陽許守中氏業醫已十數世至守中名愈大施愈廣  
入以疾邀者無分貴富賤貧輒往往輒効而例不求施  
鄙宋清之施藥受券為市醫而切慕董杏林之為人淞  
謝侯伯照嘗俾工畫者圖杏林以為贈而又求言於予  
予惟杏自托吾聖人為壇緇帷之林而六經之教始及  
天下澤覃於萬世無止噫杏之盛也蔑加此已神仙者  
流如董奉氏亦托杏為施成林於廬山五老之間其施  
雖隘杏之惠猶未絕也其不愈於羯鼓催花驕兒婦人

以造化立坊碎錦侈容於午橋之游衍者乎若托之卯  
金之帝有曰實大如梨文頗如橘食其味者可以辟穀  
而上仙則吾未之信而奉之杏也即嵩山之杏耳將無  
信乎嵩之杏以萬計其民遇飢年皆賴杏為命而奉之  
以杏一器易穀一器以贍飢者藉杏以為施仁亦至矣  
又何必神辟穀之杏乎吁此奉狡獪術也守中氏以其  
施為心而不藉狡獪以為神杏之植多植寡吾曾不計  
而況計粟之易多易寡乎此其為仁近吾聖人之仁而

非狡獪之仁也使守中有計較心又何愈於宋清乎守中聞余言而謝曰擴予仁者先生之教也

贈醫士莫仲仁序

淞之張涇有醫術過人名於士大夫者曰莫仲仁氏予來淞未識其人仲仁首謁余扣其術莫能對顧相視一笑耳從者曰仲仁氏病齟余惟聾若是何以聰於五聲之醫乎易其人且疑其術異而鄰有以其病召之即療若神者始驚其術且又介馮生淵持弓謁文生為伴狀

曰邑人某病蠱衆醫莫療仁仲氏以峻劑吐蟲若干升  
生立愈又某病寒逾九日譫口發狂陰且縮法死仲仁  
氏徐以常藥理之而平又某病噤痢不食餘七日氣始  
絕仲仁氏投以湯飲即內食飲而起又大官某氏病瘵  
醫衆爭進藥期勝仲仁氏望之而走曰雖扁鵲不可醫  
已出門而斃諭爾則仲仁氏聾於耳未嘗聾於心與目  
也桑君教扁鵲者以飲上池而使之視其五臟若神鏡  
見膽耳故鵲兄弟三人皆善醫長兄神於視色仲兄神

於視毫毛醫固不貴於聰聽而貴於明視也諗矣余聞古至人者有明而不視聰而不聞蓋養明於不視而無不視蓋養聰於不聞而無不聞若仲仁之聾其養聰者非歟不然聾者視明聾者聽聰絕利一原用師十倍仲仁氏聾於耳宣其聰於心與目者非妄庸師之可及也今之妄庸師有推而為國師衣繡驅良從者後先以出入於王公貴人之門遇疾則雜投藥石以希倖中中輒繳美譚於文章家以登載其能不中不以咎之也若

是者曷可勝算而仲仁氏覆以病聾見遺於野是戢勁  
翻於鷗之退藏逸蹟於駿之伏者也其求余言與夫衣  
繡驅良飾繆陋以繳美譚者異故予樂畀之以言至正  
庚寅春王三月有二日拜手書

無聲詩意序

雲間陶叔彬氏有畫帙題曰無聲詩意皆錄代之名畫  
也請予文序其端東坡以詩為有聲畫畫為無聲詩蓋  
詩者心聲畫者心畫二者同體也納山川草木之秀描

寫於有聲者非畫乎覽山川草木之秀叙述於無聲者  
非詩乎故能詩者必知畫而能畫者多知詩由其道無  
二致也叔彬名畫以詩意不惟知畫且知詩矣詩之弊  
至宋末而極我朝詩人徃徃造盛唐之選不極乎晉魏  
漢楚不止也畫亦然吁此豈人性之有異哉世運否泰  
之異耳第未知叔彬所蓄之畫繇宋而唐者幾何繇唐  
而晉魏者又幾何求之勤而藏之夥他日使余見之某  
畫顧長康陸探微張僧繇也尚有以卜余論之不誣人

哉是為序

圖繪寶鑑序

雲間義門夏氏孫名文彥字上良集歷代圖繪寶鑑凡若干卷由史皇封膜而下訖于有元凡若干人其詳博補郭若虛之所遺其用亦勤持矣其子大有持其編謂予草玄閣曰鄧椿有言其為人也多文雖有不曉畫者寡矣其為人也無文雖有曉畫者寡矣先生海內知文人與歐陽文忠東坡山谷後山宛丘淮海內岩漫仕龍



眠諸公等聲價敢乞一言標其端予曰書成於晉畫盛  
於唐宋書與畫一耳士大夫工畫者必工書其畫法即  
書法所在然則畫豈可以妄庸人得之乎宣和中建五  
嶽觀大集天下畫史如進士科下題掄選應詔者至數  
百人然多不稱上旨則知畫之積習雖有譜格而神妙  
之品出於天質者殆不可以譜格而得也故畫品優劣  
關於人品之高下無論侯王貴戚軒冕才賢山林道釋  
世胄女婦苟有天質超凡入聖即可冠當代而名後世

矣其不然者或事模擬雖入譜格而自家所得於心傳  
神領者則蔑矣故論畫之高下者有傳形有傳神傳神  
者氣韻生動是也如畫猫者張壁而絕鼠大士者渡海  
而滅風翊聖真武者叩之而響應寫人真者即能奪其  
精神若此者豈非氣韻生動機奪造化者乎吾顧未知  
寶鑒中事模擬而得名者士良亦能辨之否乎雖然梁  
武作歷代書評米元章作續評非神識高者不能吾欲  
作歷代畫評以繼蕭米士良父子當有以贊予之品藻

也而吾所屬大有圖畫紀詠則當亟成以繼寶鑒云是  
為序

送寫神葉清友序

古今稱傳神者晉之顧長康氏長康寫照非徒得人之  
形似而併以其情性精爽者得之此古今之妙稱也其  
寫褰叔則頰上益以三毛而褰之神明見寫謝幼與置  
之岩石之褰而謝之情性知傳神而不得其精爽情性  
徒求規規之形似其去土木之偶奚遠哉天台葉清友

昏其父可觀觀京師嘗寫天顏被命為提舉梵像監  
清友紹其家傳嘗為予寫鹿冠吹笛之象于五湖之間  
談者謂非徒得予形骨而又得予神明不在長康氏之  
下也予嘗論傳神如長康氏可謂絕古今之妙矣抑律  
之在古殷之畫工則長康氏又有所不能也高宗夢賢  
於野俾畫工以象求之得諸傳說惟肖說以夢交於畫  
工也吾不知畫工何以而得肖於君之象也畫工之神  
盖有陰敘造化之妙者矣聖天子方寤寐求賢版築

之下亦有其人或俾圖像予試以畫工之神於商者神於今也長康氏之稱妙者又何足為清友道哉

送周仙客談祿命序

予嘗於談祿命者為之言曰德勝命者昌命勝德者亡推祿以命孰愈推祿以德因舉古德二事五代正延政守建遣一部將報事軍前後期當斬歸語其妻連氏連氏急遺逃之且資之金部將潛投江南李王隸查丈徽麾下徽攻延政部將領師城業陷下令曰有能全連氏

一門者賞連氏急告曰將軍不活建民妾請先死誓不  
獨生部將為之戢兵全城不殺至今連氏為建大族世  
食祿位官至卿相宋王方贄上遣均兩浙田稅錢氏時  
毒飲畝至三斗贄陡減二斗使還上責陡減田額贄對  
曰畝賦一斗此天下之通法兩浙既為王民豈宜復循  
偽國弊政上喜可其奏至今浙田著為令贄之遺澤也  
官驟升右司諫至京東轉運鹽使生五丈夫子舉準輩  
輩罕準子珪官至宰相夫呂一將婦一稅使存心仁厚

其福身福家。呂覃其子孫之慶者如此。今食祿貴人任人家國事。不肯出一言立一政。呂利天下。惟務全身保妻子。以為福人。能事而身。或有不全。妻子或中走其門者。無虛日。仙客談祿。必先警其凶吝。更宜推古德事以啓之。如連王氏之福身福家。以覃其慶於子孫者。仙客之術將有古君子之教也。故疏以告之。

送楊懋昭占數序

自星命之學代神蓍而易之數荒矣。天地之大不逃乎

數而況於萬物乎天地有定數則寒暑乘除有定筭書曰

先其筭命

逸書

今之數家有筭術而可以推步人之吉凶

悔吝亦神蓍之余靈已乎西蜀楊懋昭筭數以決人事  
人推為神筭非其筭過於蓍蔡者乎吾觀世之術數亦  
衆矣必據人之生年月日時否必傳聲傳字畫而後數  
可依也懋昭不然占人意於冥交默接之中而數生焉  
數生而卦象士焉卦象士而易之繇灼見於休咎之應  
吁亦神矣故曰筭過於蓍蔡而知大易前民之用者未



亡也雖然卦爻數也有理焉理制於數而理之順亦足以役數嚴遵以易占人而必依數言理與人子言依於孝與人臣言依於忠蓋約數以理也邴吉以陰德延齡貢禹以守節愈疾非理之順者足以役數乎懋昭言人以數盡亦參之以理庶先天後天之道備而易之教行矣懋昭謹余言書其說以去

送何心傳序

世之非相地者曰古之葬者授地於百司無相地之術

也昔之聖人仰觀俯察求利於吾人至於農獵之賤無  
不推其利害以詔於人使相地之術果信何其教不在  
農獵後也余嘗辨之曰卜其兆或以為藏者安不可  
無也卜其脉絡形勝以為生者貪賤富貴壽夭賢昏之  
辨則未必有也詩云既景乃岡相其陰陽則岡之陰陽  
亦有係於相字之便不便者詩云卜澗水東瀍水西惟  
雒食則之東西亦係於遷邑之利不利也已然擇丈尺  
之定以覲福於百年之腐骨使人之愚子孫藏其祖考

十年五年不即土者則狐首指蒙之書之過也天台何  
心傳宋大學博士瓜隱先生之孫也家有六宜樓以延  
海內之名師傳講習之餘有傳其師玉平山人相地之  
術將挾是以遊京師求余一言以自儆余謂京師有公  
劉之相字姬旦之遷邑子之術亦有應於詩書者不乎  
不然以狐首指蒙之書占一桮之土以虛喝旤利以售  
其術於人之愚子孫吾固未之予也玉平之師之曰悟  
流峙之法以闡何洛之閤藏探動靜之機以識乾坤之

妙用此陰陽者流之上術也心傳有傳於此則吾之所  
未予者其知免矣夫至正八年九月十日序

贈相士孫德昭序

戰國以來聖人之道不行士之急功利者變而為遊說  
為滑稽為刑名然以三寸舌簧鼓天下之向背者則異  
甚於從衡捭闔之術也漢有天下風俗稍一被從衡捭  
闔者知其伎之窮則又轉時為談天相人之術敗君誤  
世者往往有焉而明昭往史亦不少也唐以後習相人

術者益紛紛焉挾是以為食則其售於人者急而固於人者宜無所不至揣摩臆度言與其術自兵而有弗計也嘻以相求相者將有利於己之貴富慶祥以相相人尤將有利於人之貴富慶祥耳故相人者言慶言祥則求相者喜言妖言禍則求相者怒相人者將以為利也又安得言妖言禍以犯人之怒而絕己之利哉毋惟其揣摩臆度之說與其術自兵而有所弗計也雲間孫得昭氏於金陵山中得異人相術其授受不苟其談相於

人也善則云善惡則云惡善不善也由乎人利不利也由乎天而吾所首之術不明由人由天者有所改也所謂士之仰不愧俯不忤者歟相術而有人若是蓋亦近乎道以君子之論有所弗惜也因其乞言遂書以為序至正九年夏五月十四日

送陳生彥高序

藝必貴乎積積而后化化而后神師曠氏之鼓琴也奏清徵而玄鶴集奏清角而風雲猝變者非其精而化化

而神之効若是歟君子論古樂之人而動物者必曰琴而箏箏箏篪有所不預焉於乎大雅之音無聞也則知今之樂有精而化化而神如師曠氏之琴也獨不動物乎松陵陳生彥高博學多才藝尤邃於音律余嘗於三泖水雲之區聽其鼓十三絃之操作商聲調林籟激發轉徵音而魚龍悲嘯緣情而鼓欲樂則樂欲悲則悲故喜者或滯淚戚者或起舞所謂藝之動物者非欲歟抑余聞晉謝仁祖喜箏歌秋風一詞而受過於桓溫亟引

歸府生嘗東遊甌越達官貴人有以溫之引祖仁者引  
生矣今且洽事漕府將有祿位於民上矣吁非其藝之  
動物而遇於人者至是乎吁一藝之精尚耳而況藝之  
上於生者乎因其請言故爲藝說以竒生之遇而嘆儒  
人遇有不生如者非藝之罪也藝之精而至於神者未  
至於生也至正庚寅三月十五日序

朱明優戲序

百戲有魚龍角觝高絙鳳凰都盧尋潼戲車走丸吞刀



吐火扛鼎象人恠獸含利潑寒蘇莫等伎而皆不如俳  
優侏儒之戲或有關於諷諫而非徒為一時耳目之玩  
也窟礪家起於偃師獻穆王之伎漢戶牖侯祖之以解  
平城之圍運機關舞埤間闕支以為生人後翻為伶者  
戲具其引歌舞亦不過借吻角呖唧聲未有引以人音  
至於嬉咲怒罵備五方之音演為諧諢嚙啞而成劇者  
也玉峰朱明氏世習窟礪家其大父應俳首駕前明手  
益機警而辨舌歌喉又悉與手應一談一咲真若出於

偶人肝肺間觀者驚之若神松帥韓侯宴余偃武堂明  
供羣木偶為尉遲平寇子卿還於降臣昏辟之際不無  
諷諫所係而誠非苟為一時耳目玩者也韓侯既賚以  
金諸客各贈之詩而侯又為之乞吾言以重厥伎於是  
乎書以遺之時至正二十六年三月二十有三日也

優戲錄序

侏儒奇偉之戲出於古亡國之君春秋之世陵轢大諸  
侯後代離拆文義至侮聖人之言為大劇蓋在誅絕之

法而太史公為滑稽者作傳取其譚言微中則感世道者深矣錢唐王昉集歷代之優辭有關於世道者自楚國優孟而下至金人玳瑁頭凡若干條太史公之旨其有槩于中者乎予聞仲尼論諫之義有五始曰諃諫終曰諷諫且曰吾從者諷乎蓋以諷之效從容一言之中而龍逢比干不獲稱良臣者之所不及也觀優之寓於諷者如漆城瓦衣兩稅之類皆一言之微有回天倒日之力而勿煩乎牽裾伏蒲之勃也則優戲之伎雖在誅

絕而優諫之功豈可少乎他如安金藏之剗腸申漸高  
之飲酖敬新磨之勉戮疲今楊花飛之易亂主於治君  
子之論且有謂臺官不如伶官至其錫教及於彌侯解  
愁具死也足以愧北面二君者則憂世君子不能不三  
喈於此矣故吾於瞻之編為叙之如此使覽者不徒為  
軒渠一噓之助則知瞻之感太史氏之感也歟至正六  
年秋七月序

東維子集卷十一